

Enimvero, statim ac Vicariatus iste erectus fuit, tibi primum, ob merita, munus illius regendi ab Apostolica Sede commissum fuit; ipse autem nil intentatum reliquisti ut istam Dominicæ Vineæ partem, tam dissitam, christianæ doctrinæ rore fecundissimam efficeres. Qui profecto labores abs te in rem tam nobilem tamque sanctam collati uberrimos sane fructus protulere; in præsens enim, ex omnibus istius regionis incolis, perpauci admodum sunt quibus, ob magnam locorum longinquitatem asperitatemque viarum, Crucis sapientia non fuerit allata. Spem tamen bonam habemus fore ut, divina favente gratia, quam primum Missionales tui, difficultatibus omne genus superatis, ea petant disjunctissima loca in iisque fructuose desudent. Quam quidem communem spem ut Deus ad effectum perducatur enixe rogamus.

Lætare igitur, Venerabilis Frater, de fausto lætoque eventu qui appropinquat, dum Nos, ut hæc solemnis uberiorem lætitiâ tuis omnibus afferant, facultatem tibi facimus Papalem impertiendi Benedictionem, cum indulgentia plenaria, ab iis in forma Ecclesiæ consueta lucranda, qui Sacris intererunt. Accipias nunc omina Nostra, cum Apostolica Benedictione conjuncta, quam tibi, Venerabilis Frater, iisque omnibus qui tuæ sunt curæ concrediti amantissime in Domino impertimus.

Datum Romæ, apud Sanctum Petrum, die 8^a mensis Maii, anno MCMXXVI, Pontificatus Nostri quinto.

PIUS PP. XI.

§ V. — Vicariat de Grouard ¹.

PIUS PP. XI,

AD FUTURAM REI MEMORIAM.

Quæ ad rei sacræ procuracionem melius gerendam expedire videantur ut mature præstemus Nos admonet supremi officium Apostolatus quo in terris divinitus fungimur.

(1) Cfr. « *Acta Apostolicæ Sedis* », Annus XIX, Num. 8 (Augusti 1927), pag. 267-268 : — *Acta Pii PP. XI : Litteræ Apostolicæ* (I) : *Nova delimitatio inter Vicariatus Apostolicos de Mackenzie et de Athabaska, qui est in posterum de Grouard denominandum.*

Jamvero, cum in America septentrionali illa regio Vicariatus Apostolici de *Athabaska*, quæ ad orientem lineæ meridianæ 113° (longit. occid. a Meridiano Greenwich) sita est, haud facile ab eodem Vicario Apostolico queat lustrari incolasque capiat qui magis affinitate sociantur cum tribus indigenis Vicariatus Apostolici de *Mackenzie* proxime continentis, opportunum maxime visum est, ad rei christianæ bonum atque incrementum utriusque Vicariatus, limites immutare.

Collatis itaque consiliis cum VV. FF. NN. Sanctæ Romanæ Ecclesiæ Cardinalibus negotiis Propagandæ Fidei præpositis, omnibus adjunctis sedulo studio perpensis, motu proprio atque ex certa scientia et matura deliberatione Nostris, deque apostolicæ nostræ potestatis plenitudine, præsentium tenore, regionem quæ vergit ad orientem lineæ meridianæ 113° a Vicariatu Apostolico de *Athabaska* sejungimus sive dismembramus, eandemque ita per Nos separatam finitimo Vicariatu Apostolico de *Mackenzie* adjungimus, ita ut ipse linea meridiana 113° posthac limes sit inter ambas superenunciatas Missiones.

Cum vero, mutato sic limite, flumen *Athabaska* itemque lacus et urbs nominis ejusdem a territorio Vicariatus Apostolici de *Athabaska* nunc exclusa maneat, eadem Nostra auctoritate, præsentium tenere, volumus ut idem Vicariatus Apostolicus jam non de *Athabaska* sed de *Grouard* nomen habeat, ab illius Vicarii Apostolici deductum.

Hæc mandamus ac edicimus, decernentes præsentas Litteras firmas, validas atque efficaces jugiter exstare et permanere, — suosque plenos atque integros effectus sortiri atque obtinere, — illisque, ad quos spectant sive spectare poterunt, nunc et in posterum amplissime suffragari, — sicque rite judicandum esse ac definiendum, — irritumque ex nunc et inane fieri, si quidquam secus, super his, a quovis, auctoritate qualibet, scienter sive ignoranter, attentare contigerit, non obstantibus constitutionibus et ordinationibus apostolicis ceterisque in contrarium facientibus quibuscumque.

Datum Romæ, apud Sanctum Petrum, sub annulo Piscatoris, die 15^a mensis Martii, anno MCMXXVII, Pontificatus Nostri sexto.

L. † S.

P. Card. GASPARRI, *a Secretis Status*.

§ VI. — Préfecture de Pilcomayo ¹.

SACRA CONGREGATIO
DE PROPAGANDA FIDE

2246/27.

DECRETUM.

Hæc Sacra Congregatio Christiano Nomini Propagando, spiritualibus necessitatibus christifidelium ac populorum in territorio Præfecturæ Apostolicæ de Pilcomayo providere cupiens, ad munus Administratoris Apostolici in dicta Præfectura eligere censuit et, per præsens decretum, eligit ac nominat

R. P. Henricum BREUER,
ex Instituto Oblatorum SSmæ et Immaculatæ Virginis MARIE, eidemque facultates necessarias et opportunas ad regimen supradictæ Præfecturæ, prout in adnexo folio exhibentur, tribuit.

Datum Romæ, ex Ædibus ejusdem S. Congregationis, die 18 Junii 1927.

Gulielmus-Maria Card. VAN ROSSUM, *Præfectus*.
L. † S. Franciscus MARCHETTI-SELVAGGIANI,
Archiep. Seleucien., Secretarius.

§ VII. — Approbation des « Emendationes ».

SACRA CONGREGATIO
DE RELIGIOSIS

2817/27 (M. 29.).

DECRETUM.

Emendationes præsentii exemplari Constitutionum Congregationis Missionariorum Oblatorum SSmæ et Imma-

(1) Cfr. « *Acta Apostolicæ Sedis* », Annus XIX, Num. 8 (Augusti 1927), pag. 282 : — *Sacra Congregatio de Propaganda Fide : Nominationes*.